

## Малд хот белдлгъиг арднъ ордж чанъгъахмн

Мана танъгъчд эн джилд снā сән ургъц гарси учрар, олна малиг хойр джилин эргъцд кўрм шимтā хотар теткдж болхмн. Мана колхозмуд бодн совхозмуд 1 сай 865 минъгън 20 гектар газрин агъуд ѓвс хаддж хурахмн, тўунās талдан 70 минъгънās улў газрт тәрмр ѓвс хадхмн.

Ѓвсн мана танъгъчд ик чинртā тѓр, — тер юнъгад гихлā, танъгъчин эдл-ахун гол халхнъ мал ѓсклгън, тер тоод икнъкнъ торгън нооста хѓд.

Болв ѓвс хаддж хуралгъна йовуд мана колхозмудар болн совхозмудар ик тату. Июнь сарин 15-д танъгъчар хадгдсн ѓвснъ 34 процент, овалгдснъ 44 процент, тоннарнъ тоолхла 89 минъгън 644 тонн ѓвсн.

Эн кѓдлмшт ўзмджтā йовхнъ Приютненск район (КПСС-н райкомин сеглāтрнъ ўр Постников, кўцāгч комитетин ахлачнъ ўр Яшкилев), эднā цуг хадснъ — 70,6 процент, овалснъ — 54 процент. Яшалтинск

район (КПСС-н райкомин сеглāтрнъ ўр Бондарев, кўцāгч комитетин ахлачнъ ўр Ширипов) ѓвс хадлгъна зурагъан 74,6 процент, оваллгъна — 56 процент кўцāв.

Ѓвс хадлгъяр ик му йовхнъ Приозерн район (КПСС н райкомин сеглāтрнъ ўр Кокшунов, кўцāгч комитетин ахлачнъ ўр Олюнин) зурагъар хадгдх 355 минъгън 822 гектар газрас хадснъ 62 минъгън 898 гектар, эс гидж 20,6 процент, хадснасзуг 37 процентнъ овалгдв. Эн района ѓвс хаддж хуралгънд кѓдлдж йовх āмтнā кўч-кѓлсиг чикднъ бўрдлгън, бāйсн техникāн бўкднъ олзлдж эдллгън ик му болсн учрар, малин хот белдлгънā кѓдлмш иим хашнъ йовна.

Ѓмн нўурт йовснас ўлгўр авч, мана цуг район ѓвс хаддж хуралгъна кѓдлмшиг ясдж, малин хот элвгār белдхин тѓлā цуг чидлāн тāvх зѓвтā.

**Б. БОЛДЫРЕВ,**

КПСС-н обкомин инструктор.